

**ODLUKA O USLOVIMA I NAČINU DODJELE  
"ŠESTOAPRILSKE NAGRADE GRADA SARAJEVA"  
(Prečišćeni tekst)**

**Član 1.**

"Šestoaprilska nagrada Grada Sarajeva" (u daljem tekstu: Nagrada) dodjeljuje se kao najviše društveno priznanje za značajna ostvarenja i značajne rezultate rada u oblastima:

- privrede,
- nauke i obrazovanja,
- kulture i umjetnosti,
- sporta,
- zdravstva i socijalne zaštite,
- drugim oblastima rada i stvaralaštva,

bez obzira na godinu ostvarenja, a koji doprinose ukupnom unaprjeđenju, promociji i razvoju grada Sarajeva, kao glavnog grada Bosne i Hercegovine i Federacije Bosne i Hercegovine.

**Član 2.**

Pod značajnim ostvarenjima, u smislu ove Odluke, podrazumijevaju se djela ostvarena u kontinuitetu koja se ocjenjuju kao doprinos razvoju odgovarajuće oblasti, u skladu s kriterijima uobičajenim za konkretnu oblast, a koja doprinose ukupnom razvoju, odnosno promociji grada Sarajeva.

**Član 3.**

Za dodjelu Nagrade, početkom januara, u sredstvima javnog informiranja objavljuje se javni poziv za predlaganje kandidata za dodjelu Nagrade u tekućoj godini.

Nagrada se dodjeljuje:

- pojedincu,
- grupi (okupljenim pojedincima na realizaciji određenih poslova s rezultatima koji se mogu razmatrati u kandidaturi za dodjelu Nagrade kao značajna ostvarenja, odnosno značajni rezultati rada), i
- kolektivu (privrednom društvu, ustanovi, udruženju i drugom pravnom subjektu s područja Grada Sarajeva, kao i onom van područja Grada Sarajeva, ako se njihova ostvarenja, odnosno rezultati rada odnose na grad Sarajevo).

Nagradu za oblast iz člana 1. Odluke moguće je dodijeliti u jednoj godini ukoliko budu istaknute najmanje dvije kandidature po oblasti.

**Član 4.**

Nagrada se ne može dodijeliti organima uprave svih nivoa vlasti u Bosni i Hercegovini, izabranim funkcionerima, poslanicima i vijećnicima svih nivoa vlasti u Bosni i Hercegovini za vrijeme trajanja njihovih mandata, kao ni zaposlenima u organima uprave svih nivoa vlasti u Bosni i Hercegovini za ostvarenja koja se odnose na djelovanje u okviru djelokruga posla koji vrše u organu uprave.

**Član 5.**

Nagrada se dodjeljuje u obliku Povelje.

**Član 6.**

Povelja iz člana 5. stav 1. i 2. Odluke sadrži tekst: "BOSNA I HERCEGOVINA, FEDERACIJA BOSNE I HERCEGOVINE, KANTON SARAJEVO, GRAD SARAJEVO",

sa suhim grbom Grada Sarajeva, centriran na vrhu stranice formata A3. Ispod teksta iz stava 1. ovog člana, ispisuje se sljedeći tekst: "Na osnovu Odluke Gradskog vijeća Grada Sarajeva o dodjeli "Šestoaprilске nagrade Grada Sarajeva", broj \_\_\_\_, dodjeljuje se:". Na sredini Povelje je tekst: "ŠESTOAPRILSKA NAGRADA GRADA SARAJEVA", ime i prezime lica, odnosno imena članova grupe ili naziv kolektiva kojima se Nagrada dodjeljuje. Ispod teksta iz prethodnog stava, ispisuje se kratko obrazloženje, odnosno navodi se oblast rada i stvaralaštva u kojoj je dobitnik Nagrade ostvario značajne rezultate. U donjem lijevom uglu je oznaka datuma, mjesta i broja odluke, a u donjem desnom uglu je potpis gradonačelnika Grada Sarajeva. O izgledu Povelje, odlučuje gradonačelnik uz prethodno mišljenje Komisije za izbor i imenovanja. Uz Povelju se uručuje i Odluka Gradskog vijeća Grada Sarajeva o dodjeli "Šestoaprilске nagrade Grada Sarajeva" za odgovarajuću godinu, kojom se utvrđuje vrsta i sadržaj Nagrade, dobitnik Nagrade, te uručivanje Nagrade od strane gradonačelnika na Svečanoj sjednici Gradskog vijeća Grada Sarajeva.

#### **Član 7.**

Kad se Nagrada dodjeljuje grupi, svaki član grupe dobija Povelju.

#### **Član 8.**

U jednoj godini može se dodijeliti najviše šest Nagrada, iz svake oblasti jedna, bez obzira da li se radi o pojedinačnoj, grupnoj ili kolektivnoj Nagradi. Nagrada se istom licu, iz člana 3. Odluke, može dodijeliti samo jedanput.

#### **Član 9.**

Nagrada se dodjeljuje svake godine i uručuje 6. aprila, na Svečanoj sjednici Gradskog vijeća. Nagradu uručuje gradonačelnik.

#### **Član 10.**

Pravo predlaganja kandidata za Nagradu imaju privredna društva, ustanove, udruženja građana, grupe od najmanje 200 građana i druga pravna lica, sa područja Sarajeva. Subjekti iz stava 1. ovog člana, nemaju pravo isticanja sopstvene kandidature za Nagradu. Prijedlog iz stava 1. ovog člana podnosi najviši kolektivni organ upravljanja, uz obaveznu dostavljanja zapisnika i odluke tog organa o podnošenju prijedloga kandidata za Nagradu. Pravo predlaganja kandidata za Nagradu ima i gradonačelnik.

#### **Član 11.**

Prijedlog iz stava 3. prethodnog člana dostavlja se u tri (3) primjerka sa detaljnim podacima i obrazloženjem. Obrazloženje sadrži podatke o kandidatu, ukupan radni opus i posebne zasluge u oblasti zbog kojih se kandidat predlaže za Nagradu.

#### **Član 12.**

Gradsko vijeće obrazuje Odbor za dodjelu "Šestoaprilске nagrade Grada Sarajeva" (u daljnjem tekstu: Odbor). Odbor iz stava 1. ovog člana čine članovi Komisije za izbor i imenovanje Gradskog vijeća i šest istaknutih javnih djelatnika iz oblasti za koje se Nagrada dodjeljuje. Kolegij Gradskog vijeća Grada Sarajeva kandidira Komisiji za izbor i imenovanja kandidate za članove Odbora iz reda istaknutih javnih djelatnika, iz prethodnog stava. Komisija za izbor i imenovanja utvrđuje prijedlog i upućuje ga Gradskom vijeću Grada Sarajeva na razmatranje i usvajanje.

Predsjednik i zamjenik predsjednika Komisije za izbor i imenovanja Gradskog vijeća su predsjednik i zamjenik predsjednika Odbora.  
Mandat članova Odbora iz reda istaknutih javnih djelatnika traje godinu dana.

#### **Član 13.**

Odbor iz prethodnog člana ove Odluke, na prvoj sjednici, donosi Poslovnik kojim se uređuje način rada, a posebno se definiira tajnost rada Odbora, do donošenja konačne odluke o dodjeli Nagrade.

Poslovnikom iz stava 1. uređuje se način glasanja Odbora i to tako da posljednji krug glasanja podrazumijeva brojčano ocjenjivanje prijedloga kandidata.

#### **Član 14.**

Nakon provedenog postupka za dodjelu "Šestoaprilske nagrade Grada Sarajeva" od strane Odbora, Gradskom vijeću se upućuje prijedlog za po dva prvorangirana kandidata za svaku oblast u kojoj se Nagrada dodjeljuje, o čemu Gradsko vijeće donosi konačnu odluku tajnim glasanjem.

#### **Član 15.**

Ukoliko Odbor ocijeni da određeni prijedlog kandidata ne ispunjava uslove za dodjelu Nagrade, Odbor može uputiti inicijativu prema ovlaštenim predlagateljima, gradskim vijećnicima ili gradonačelniku, da podnesu prijedlog za dodjelu drugog priznanja ili nagrade Grada Sarajeva, u skladu sa Odlukom o priznanjima i nagradi Grada Sarajeva

#### **Član 16.**

Nagrada koja se dodjeljuje pojedincu, odnosno grupi, može se oduzeti.

Pod oduzimanjem Nagrade podrazumijeva se oduzimanje Povelje pojedincu, odnosno članu grupe. Nagrada se oduzima ako je nagrađeno lice pravosnažnom sudskom presudom osuđeno od Međunarodnog suda za ratne zločine počinjene na teritoriji bivše Jugoslavije, ili koje je pravosnažnom sudskom presudom, od bilo kojeg suda sa područja Bosne i Hercegovine, osuđeno za krivično djelo protiv života i tijela na kaznu zatvora od najmanje godinu dana, protiv slobode i prava građana, protiv dostojanstva osobe i morala, protiv imovine, protiv pravosuđa, protiv službene i druge odgovorne dužnosti, protiv osnova društvenog uređenja i sigurnosti.

Nagrada se može oduzeti ako je nagrađeno lice pravosnažnom sudskom presudom osuđeno na kaznu zatvora preko tri godine ili težu kaznu, a ne radi se o krivičnom djelu iz prethodnog stava.

#### **Član 17.**

O oduzimanju Nagrade odlučuje Gradsko vijeće na prijedlog Odbora.

Odluka o oduzimanju Nagrade objavljuje se u "Službenim novinama Kantona Sarajevo" i sredstvima javnog informisanja.

#### **Član 18.**

Članovi Odbora imaju pravo na naknadu za svoj rad.

Visinu naknade iz stava 1. ovog člana, utvrđuje Administrativna komisija Gradskog vijeća.

#### **Član 19.**

Sredstva za dodjeljivanje Nagrade i za rad Odbora obezbjeđuju se u Budžetu Grada Sarajeva.

#### **Član 20.**

Služba Gradskog vijeća vrši stručne i administrativne poslove i vodi evidenciju o dodijeljenim Nagradama.

**Član 21.**

Gramatička terminologija korištenja muškog i ženskog roda u ovoj Odluci podrazumijeva uključivanje oba roda.

Sarajevo, 30.11.2015. godine